

東

華

錄

東華錄

康熙

臣王先謙敬

臣周澐蕃恭校

康熙三十七年戊寅春正月辛巳議政大臣等奏厄魯特扎什巴圖爾台吉乃青海台吉之統領與土謝圖戴青納木扎爾額爾德尼台吉彭楚克台吉等率其所屬誠心歸化當封何爵伏候上裁得旨封扎什巴圖爾爲親王土謝圖戴青納木扎爾額爾德尼爲貝勒彭楚克爲貝子○庚寅策妄阿喇布坦遣彭蘇克喇木扎木巴多爾濟寨桑等進貢奏言第巴將達賴喇嘛圓寂之事匿而不宣斥正傳之聖徒班禪自尊其身有玷道法詐稱達賴喇嘛之言以混亂七旗喀爾喀四厄魯特好事樂禍正未有已祈皇上睿鑒俾法門之教無玷使眾生爭自濯磨上召彭蘇克喇木扎

木巴多爾濟寨桑至前問以奏參第巴之故奏曰 聖主曾諭云  
凡有衷情不必疑忌悉皆奏聞今者第巴監禁班禪不使人見奉  
事紅帽兩喇嘛名德爾端多爾濟扎卜者詭稱卽見世達賴喇嘛  
化身其行不端有乖道法台吉是以參奏 上諭之曰休息兵戎  
令宇內昇平始云道法若以護法爲辭必生釁端如爾等雖招撫  
回子曾滅其教亦能令其皈依佛法跪拜喇嘛否今天下太平之  
時惟令各行其道若強之使合斷不可行四十九旗扎薩克蒙古  
等迄今六十餘年朕視如一家初喀爾喀厄魯特構兵時朕曾諭  
達賴喇嘛令從彼處往解朕亦於此處命大臣等前往諭之使其  
相和不意達賴喇嘛之使竟偏向厄魯特彼時朕卽知達賴喇嘛  
當已物故矣若彼尙存決不爲此第巴之構釁噶爾丹人盡知之  
又假託達賴喇嘛之言請將澤卜尊丹克巴胡土克圖土謝圖汗

執之以畀噶爾丹今者澤卜尊丹巴胡土克圖土謝圖汗親身皆  
在此處前土謝圖汗於鄂羅海諾爾地方爲噶爾丹所敗彼時曾  
遣一寨桑來奏云臣等係歷來進貢請安之國若蒙主上憐恤收  
育我等卽投順前來等語今不但澤卜尊丹巴胡土克圖土謝圖  
汗等卽七旗之喀爾喀數萬蒙古歸順前來朕皆收養離散者使  
之完聚待斃者使之生全令其各得恆業至於澤卜尊丹巴胡土  
克圖土謝圖汗朕皆待以優禮未嘗有替眾蒙古以第巴爲達賴  
喇嘛傳戒之人皆緘口不敢議朕曾以敕諭往責第巴彼甚心服  
具奏認罪朕因宥之嗣後第巴若改前行敬奉班禪達賴喇嘛則  
已若仍怙終不悛朕不但不寬貸第巴卽其親密之青海台吉等  
朕亦不輕恕也前者青海台吉等聞朕出師甯夏之語盡皆震動  
遊牧移營而去今者青海台吉等以噶爾丹平定親來慶賀伊等

並無過端朕豈肯加兵朕統馭天下總願宇內羣生咸獲安堵豈有使爾兩國生釁之理凡事惟期安靜而已○壬寅諭大學士等運往朝鮮國米石著侍郎陶岱共運至三萬石以一萬石賞資朝鮮國以二萬石平糶○癸卯 上巡幸五臺山啟鑾○甲辰 上駐蹕涿州長溝二里橋命 皇長子允禔大學士伊桑阿祭金太祖世宗陵

二月辛亥諭戶部山西平定等十一州縣連年歉收民間乏食朕心深爲軫念所欠康熙三十六年錢糧悉行蠲免仍發倉賑濟毋致流離有妨耕種○壬子以征噶爾丹功封厄魯特貝勒巴圖爾額爾克濟農子雲木春爲輔國公○癸丑 上駐蹕菩薩頂○丙辰 上回鑾○乙丑遣官賑濟南兗州青州三府○以張仲信爲廣東按察使

由雲南糧道遷

○戊辰

上還京師

○諭大學士等山東巡

撫李煒居官不善地方饑饉百姓乏食竟不奏聞及至言官參奏始行具奏朕爲人君於國計民生日切存心詳加審慮李煒身任巡撫不知撫恤百姓著革職○命原任河道總督于成龍閱渾河王新命閱保定南河○工部議覆漕運總督桑額等奏會勘開濬下河一高郵之水勢宜分一車兒埠入海之口宜開一丁溪入海之口宜通一小海場入海之口宜開一草堰場洩水之閘宜增一運河之水勢宜分應令將各項工程估計具奏從之○壬申直隸巡撫沈朝聘以老病乞休允之○命原任河道總督于成龍以總督管直隸巡撫事○以李鈞爲山東巡撫由督補侍郎遷○乙亥以征噶爾丹功封鄂爾多斯貝勒松阿喇布爲郡王公杜楞爲貝子○以囊吉里爲甘肅布政使覺羅巴哈布爲山西按察使由鎮史遷○是月免浙江宣平江南泗州上年被災額賦

三月丙子朔

上御經筵○丁丑冊封

皇長子允禔爲直郡王

皇三子允祉爲誠郡王

皇四子

皇五子允祺

皇七子允

祐 皇八子允禩俱爲貝勒○于成龍王新命奉旨查勘渾河清

河請訓

上諭清河發源太行山脈會漳河子牙河滹沱河易水

諸流其勢雖盛但堅築隄岸以遏之卽歲潦亦可無虞又漳河支流經大城縣入子牙河其勢湍悍數年以來文安大城諸處屢遭水患皆此河之故也爾等宜詳悉察勘至渾河發自馬邑其源甚微每遇大水之年則橫流汎濫致涸民田詳審其故蓋由渾河淤沙旣多或遇春時水乏保安以下居民又引河水灌田沙礫壅墊河身積高霍雨水發則避高就卑水勢瀾漫遂致民田衝沒爾等惟挑濬淤沙河之兩岸掘五六尺深闊令水得暢流當不至於漲溢矣爾等須詳視具奏築隄濬河工竣設立河夫委官監視及時

豫爲挑溶遇旱歲力去淤沙庶無水患矣○戊寅以王國昌爲督

捕侍郎

原任

王燕爲貴州巡撫

由湖廣布政使遷

○命內閣學士伊道等齎

敕往諭策妄阿喇布坦曰覽爾奏言第巴掩匿達賴喇嘛圓寂之事斥班禪而自尊有玷道法好事如此恐禍正無已又爾所遣彭蘇克喇木扎木巴多爾濟寨桑等口奏爾之言云第巴監禁班禪不使人見奉事紅帽兩喇嘛名德爾端多爾濟扎卜者卽見世達賴喇嘛化身亦以是兩喇嘛之言謂之達賴喇嘛而已並非班禪之言是以可疑第巴壞法門之教罪不可容本朝與達賴喇嘛交往七十餘年第巴原係達賴喇嘛執事下人因軫念達賴喇嘛欲使扶持道法是以優封爲土伯特國王乃以久故之達賴喇嘛詐稱尙存以欺眾唆噶爾丹興戎所行不軌今又奏稱俟班禪胡土克圖往觀之時奏明而又不遣班禪且致書求爾勿遣觀此其情



已極昭著矣爾所奏良是爾抒實情思爲法門之教班禪胡土克圖之事而劾奏第巴朕深許之爲此特差內閣侍讀學士伊道近御侍衛拉錫二等侍衛克什圖內閣侍讀常明三等侍衛津巴爲使以伴敕例賜御用綵段十端○甯夏總兵官王化行以本姓殷具奏請復允之○乙酉山東巡撫李鈞以病乞解任調理允之○丁亥以任風厚爲湖廣布政使由貴州按察使遷○戊子諭大學士等聞

湖廣江西江南浙江廣東廣西福建陝西山西米價騰貴是必糜費於無益之事湖廣江西地方糧米素豐江南浙江咸賴此二省之米今此二省米價騰貴誠爲可虞酒乃無益之物耗米甚多朕巡幸直隸等處見雖有禁造燒酒之名地方官不甚加意未曾少止著令嚴禁以裨民食○己丑以王國昌爲山東巡撫由督捕侍郎遷○辛卯直隸巡撫于成龍以渾河圖形呈覽奏曰臣同西洋安多等

自霸州至郎城履舊河形細加丈量由永清固安至張協有舊隄一道約有七十里尙可幫修水溜亦在此處可以挑濬 上曰朕經行水災地方見百姓以水藻爲食朕曾嘗之百姓艱苦朕時在念是以命爾於雨水之前速行濬河築隄使田畝得耕百姓生計得遂不知六月內可告成否于成龍奏曰臣董率分修各官作速辦理六月內可以完工○丙申調喻成龍爲督捕侍郎以徐潮爲刑部右侍郎

原任工部右侍郎

○壬寅以彭鵬爲貴州按察使

由給事中遷

夏四月甲寅理藩院議覆烏朱穆秦親王色登敦多卜奏懇將克勒河朔等地給伊屬下就食人耕種應如所請得旨理藩院事每多稽滯此耕種關繫蒙古諸人生計若不速遣必致經霜失時著速派司官卽日行○工部左侍郎圖爾宸以年老乞休允之○戊午轉常綬爲工部左侍郎以羅察爲工部右侍郎

由內閣學士遷

○己未

敘征噶爾丹功授西安將軍參贊博爾濟等世職有差○壬戌諭大學士等廣東海關收稅人員按檢商船貨物概行徵稅以致商船稀少關稅缺額且海船亦有自外國來者如此瑣屑甚覺非體著減額稅銀三萬二百八十五兩著爲令○策妄阿喇布坦奏臣之與哈薩克搆兵非得已也昔噶爾丹擒哈薩克頭克汗之子以畀達賴喇嘛故頭克使人乞臣關說求還其子與彼完聚臣乃使人於達賴喇嘛索得頭克之子撥五百人護送歸之頭克反盡殺臣五百人後又殺臣屬下吳爾赫德巴圖爾台吉掠取其人民續又掠我吳梁海百餘戶人臣妻父阿毓奇以其女歸臣使妻兄三濟扎布送臣之妻彼又要截於路去歲秋臣商人自鄂羅斯歸彼又掠之哈薩克屢來犯臣有如許過惡臣是以興兵而往恐 聖上謂臣喜事好兵故陳此自白又丹津鄂木布聽讒與噶爾丹同殺

其兄索諾布阿拉布坦後臣與噶爾丹分散各自遊行丹津鄂木布又偕阿奴喀屯往就噶爾丹今窮迫而後來歸臣若使彼逸居恐又聽讒害臣臣是以拘而禁之爲此遣使阿布都拉厄爾克寨桑薩木坦達爾漢鄂珉布等奏聞 上命示議政大臣○甲子以

恩丕爲內閣學士

由內閣侍讀學士遷

○予故貴州巡撫閻興邦祭葬○己

巳諭宗人府溫郡王延壽行止不端並不思效力行走甚屬負恩此王原非承襲之爵乃增封之王伊父爲人原亦平常著將延壽革去王爵授爲貝勒又固山貝子袁端各處俱不行走但與在外漢人交往飲酒妄恣亂行著黜革鎮國公明瑞爲人庸劣懶惰亦著黜革向來王貝子公等時常上朝近不上朝再右翼公等內亦有懶惰不行走者著宗人府會同領侍衛內大臣等將懶惰不行走者奏參革退尋議鎮國公劉永門度懶惰應革退普貴原有瘋

疾今雖痊愈不便令其行走亦應革退得旨劉永門度依議黜革  
鎮國公根度爲人甚屬乖張肆無忌憚亦著黜革普貴向來行走  
尙優旣稱瘋疾已痊愈著照常行走○辛未增置雲南府州縣學生  
員○癸酉 上啟鑾閱漕河及耍兒渡等隄岸

五月甲戌朔 上登陸巡視武清縣隄岸眾民跪叩奏曰耍兒渡  
地方自蒙 皇上修築迄今永無水患此處隄岸正當水勢衝射  
請於隄岸之外另築一隄 上曰此隄岸之外若另作一隄爾等  
田畝豈不多致占廢眾民奏曰原非一家田畝卽稍入隄內於小  
民亦無大損儻河水一決其患更甚 上曰轉盼間雨潦將居今  
歲不及修築暫立木椿堅護隄岸另開小河以洩水勢今歲田畝  
可以無虞俟明春雨水前另築重隄爾等田廬俱得安固矣○癸  
未 上還京師○諭大學士等門度根度乃貝勒尙善之子今兩

公爵俱革尙善別無公爵之子孫則其爵遂絕矣著交宗人府議奏尋宗人府奏門度之祖費颺武係輔國公門度應襲公爵得旨門度著襲封輔國公○庚寅諭大學士等覽科道衙門月終註銷案件但奏稱無違限之事而事務若干件於幾日完結並未開載此後應將事件數目並完結日期於疏內詳列具奏○己亥以廣東錢價日輕停鼓鑄○辛丑兵部等衙門議覆雲南貴州總督王繼文奏魯魁山賊首擦捏等劫掠夷村傷新岫營守備張廷柱臣會同臨元總兵官王洪仁遣兵剿撫斬賊首擦捏查山林小賊無議敘之例應將在事人員無庸議敘得旨魯魁山賊眾盤踞總督范承勳巡撫石文晟俱曾面奏官兵剿殺擦捏等賊可嘉在事有功人員俱著議敘以示鼓勵○壬寅裁上林苑衙門其監丞及良牧蕃育二署署丞俱裁去

六月乙卯以魯超爲廣東布政使

由廣東按察使遷

○丁巳改四川梁萬

營參將爲化林營參將移駐化林化林營原設守備改爲中軍守備撥梁萬營千總二把總三馬步兵三百七十五名歸併化林營梁萬營存守備一把總一馬步兵二百名○戊午議政大臣等奏第巴奏言濟隆胡土克圖向日通使因初到厄魯特地方不能成功實出無可柰何今濟隆胡土克圖有疾是以略至遲延此時前去心殊憂慮祈如 諭旨勿致傷其身命鑒宥遣回等語查第巴以久故之達賴喇嘛詐稱尙在差濟隆胡土克圖於噶爾丹所烏闌布通之役濟隆胡土克圖爲噶爾丹誦經擇日交戰又噶爾丹與尙書阿喇尼交兵之時濟隆胡土克圖獻噶爾丹手帕濟隆胡土克圖情罪甚大理應立斬但康熙三十六年三月諭第巴旨內有寬宥其身命之語請將濟隆胡土克圖並其弟子發正陽門東

城下龍泉庵交步軍統領及近廟官兵看守該部酌量支給飲食第巴請遣回濟隆胡土克圖之語無庸議又班禪胡土克圖奏言前差內齊陀音宣 皇上敕旨召臣入京達賴喇嘛第巴亦曾遣使相促但臣所學者淺不能爲功於道法且未出痘疹是以不往並非第巴阻止等語查員外郎保住已齎敕往使於班禪胡土克圖此所奏亦無庸議從之○己未戶部等衙門議准雲南巡撫石文晟奏吳三桂等三逆及孫延齡屬下脫逃人員或潛匿山谷或在土司地方藏形改姓或逃入魯魁山內緝之愈嚴畏罪思脫相聚爲匪請將此內情罪可惡法不容恕者指明姓名徧行嚴拏其餘悉令免緝至於諸逆下士卒係各省之人其在逃者已奉旨免其查拏其歸順者內有閒散之人令其開墾荒地輸納錢糧子弟准其一體應試從之○戶部等衙門議奏河南任城等入衛運丁



張文安等叩闕呈告河南漕糧原在直隸大名府小灘鎮兌運原  
任巡撫李輝祖奏准改遷河南衛輝府水次路途遙遠山谷崎嶇  
輓運甚難請仍改歸小灘鎮應將河南漕糧改於小灘兌運從之  
○庚申設直隸保定府理事同知一○戊辰大學士張玉書丁母  
憂命回籍守制○盛京工部侍郎齊穡以病乞解任允之○以盧  
崇義爲廣西按察使由江南廬鳳道遷○壬申以金璽爲左副都御史由人府府丞遷

東華錄

康熙六十二

臣王先謙敬編

臣周澐蕃恭校

秋七月癸酉朔以吳璵爲保和殿大學士

由刑部尚書遷

○以蘇赫納爲

盛京工部侍郎

由內閣侍讀學士遷

○己卯京師地震○庚辰以張鵬翮

爲刑部尚書

由左都御史遷

○朝鮮國王李焞奏

皇上勅開海道運米

拯救東國以甦海濱之民飢者以飽流者以還目前二麥熟稔可

以接濟八路生靈全活無算下所司知之

御製海運賑濟朝鮮

記曰朕聞救災拯患王政所亟是以夙夜求莫雖在遐方絕域猶

若痼瘵乃身矧屬在藩維苟有疾苦何忍一日置也康熙三十六

年冬朝鮮國王李焞以比歲薦饑廩庾告匱公私困窮八路流殍

相續於道籲懇中江開市貿穀以甦溝瘠俾無殄國祀朕深爲惻

然立允其請遂於次年二月派大臣往天津截留河南漕米用商船出大沽海口至山東登州更用雞頭船撥運引路又頒發帑金廣給運值緩徵鹽課以鼓勵商人將盛京所存海運米平價貿易共水陸運米三萬石內加賚者一萬石朝鮮舉國臣庶方藜藿不飽獲此太倉玉粒如坻如京人賜之食莫不忭舞忻悅凋瘵盡起該王具表陳謝感激殊恩備言民命續於既絕邦祚延於垂亡蓋轉運之速賑貸之周亦古所未有也朕念朝鮮自 皇祖撫定以來奠其社稷綏其疆宇俾世守東藩奉職修貢恩至渥矣茲者告饑不憚轉輸數千里之勞不惜糜費數萬石之粟環國土而戶給之非獨一時救災拯患實所以普澤藩封而光昭 先德也是烏可以無記○乙酉以王士正爲左都御史

由戶部左侍郎遷

○丙戌添設

齊齊哈爾城倉官一筆帖式二○庚寅轉王掾爲戶部左侍郎以

錢三錫爲戶部右侍郎

由左副都御史遷

○辛卯命吏部月選同知通判

州縣官俱引見○癸巳直隸巡撫于成龍奏霸州等處挑濬新河

已竣乞賜河名並敕建河神廟得旨照該撫所請賜名永定河建

廟立碑○乙未工部議覆漕運總督桑額等估計開濬下河應准

行 上諭大學士等下河入海之處朕雖未及親覽嘗聞人云鹽

城一帶地極窪下海水反高建閘無益儻河高海低水性趨下雖

不疏濬勢必決開一道以歸於海明代於海口設閘遇河水高則

啟閘以注諸海海水平則閉閘以禦海水前雖特令于成龍凱音

布修治毫無裨益今桑額居官雖優但此事非身親閱歷者難以

懸擬必深悉水性洞徹地形之人方可定議爾等問九卿並淮揚

等處人在朝者確議具奏○丙申以吳涵爲左副都御史

由太僕寺卿遷

○添設直隸贊皇縣守備一千總一把總二馬兵四百名○己亥

諭大學士等今叛逆噶爾丹骸骨已經接獲不日解至而遺孽就  
俘亦拘繫在此應如何處置爾等會同議政王大臣滿漢九卿詰  
朝集議以聞○大學士等奏開濬下河問之九卿及在朝淮揚人  
等九卿云淮揚人俱言開濬下河有益然此事關繫甚重應令漕  
運總督桑額會同總督巡撫確議具奏 上顧于成龍曰爾意若  
何于成龍奏曰姚二沼船廠蘆壩等河若行挑濬於民有益 上  
曰朕幸五臺山回欲觀渾河清河因由霸州而來朕意渾河清河  
俱匯流霸州城南原欲沿河修築隄岸不意至霸州詢地方百姓  
據云渾河原經固安縣後因遷徙匯合清河流至霸州二河水勢  
浩大以致泛溢爲災朕遂更初見一從民言於固安縣開河事乃  
有成朕並不固執己意爾等爲總督巡撫者能如朕之不固執乎  
然此河道甚短易於修治南省地形窪下水勢浩瀚難於修築不

比此河今若挑濬姚二沼等河爾果能保於民有益否于成龍奏  
曰水性年年變異無有一定臣何敢永保其無虞 上曰河工緊  
要必熟諳地形水勢之人能確知其利害方於民有益于成龍奏  
曰桑額爲人遇事尙能斟酌今九卿議令桑額與總督巡撫會同  
確勘定議具奏 上曰著依九卿議○以于準爲浙江按察使

直隸守

道遷○吏部議覆御史劉珩奏秦晉兩省道府州縣暨各省布政

使按察使缺出九卿詹事科道保舉賢能官員請卽於會議班次  
各書保舉之員實事數端確有憑據者不得以空言舉薦其保舉  
升用人員如日後貪婪事發將原保舉之官照督撫徇情薦舉例  
議處從之○庚子議政王大臣等議奏噶爾丹逆天負恩俟侍讀  
學士喇錫取其骸骨到京後應照吳三桂粉骨揚灰例擣爲細末  
拋散通衢塞卜騰巴爾珠爾不當存留應立斬梟示差理藩院司

官將首級往示四十九旗喀爾喀各扎薩克至色卜騰巴爾珠爾  
乳母之夫徵特和碩齊亦應處斬程貝臧布前因有要言質訊奉  
旨暫且停決茲事已畢亦應處斬得旨徵特和碩齊當免程貝臧  
布當誅此事俟朕回鑾可也喇錫到日著單身乘驛趨赴行在○  
直隸巡撫于成龍奏贊皇縣地處重山界連三省爲山賊藏奸之  
藪 皇上憫伊等無知命候補參議道李毓柱等招撫今賊首李  
斗等就撫下部知之○辛丑 上奉 皇太后詣盛京謁 陵啟  
鑾以山海關秋禾未穫命取道口外○增直隸保定河間二府屬  
管河同知各一州判一縣丞三主簿四○是月免江南海州鹽城  
縣大河衛水災額賦有差

八月壬寅朔 上駐蹕密雲縣先是 上遣內閣侍讀學士喇錫  
等齎敕往諭策妄阿喇布坦曰爾與爾叔噶爾丹分離以來誠心

恭順聘貢不絕朕亦不時加恩遣問噶爾丹逆天違背朕旨今永滅矣其屬下大寨桑諸喇嘛俱已來降止丹濟拉吳爾克扎卜數人茫無所歸流行而已近者副都統阿南達報稱丹濟拉攜其子多爾濟塞卜騰拉思倫等來降噶爾丹之屍噶爾丹之女鍾齊海程貝臧布之妻及其穉子諾顏格隆俱被爾所遺堪都等截留伊拉古克三胡土克圖往投爾所吳爾占扎卜色稜阿巴等爾已擒之阿喇爾拜自縊死車陵布木往投丹津鄂木巴布此項人等皆黨惡之人不可一日容者也若在爾地亦不利於爾故特遣敕諭爾朕旨一到爾立刻一併查拏及噶爾丹之屍與其女鍾齊海同朕使臣差人護解如此則爾始終恭順之心確著亦得長沐朕之恩寵於無窮矣儻若隱匿不行擒解不但爾歷年之恭順皆虛卽爾貿易之人亦永不許通行矣以上情事亦已明諭恐爾使人不



能全記告爾特遣內閣學士喇錫理藩院司務英古齋敕往諭以  
件敕例賜綵段十端至是策妄阿喇布坦以雲端格隆充使同喇  
錫等來獻噶爾丹骸骨喇錫等奏聞 上命喇錫等帶噶爾丹骸  
骨置京城外懸挂示眾○理藩院奏策妄阿喇布坦奏噶爾丹多  
爾濟逃來往回子所居庫察城被輝特人等所殺其下人俱四散  
噶爾丹多爾濟之母率寨桑數人向西而去矣噶爾丹之屍鍾齊  
海吳爾占扎卜等之前已曾奏請今奉 聖旨特遣使臣來是  
以將噶爾丹骸骨遣發至鍾齊海及吳爾占扎卜等寨桑請以昇  
我厄魯特降人在中國者仍請鑒恤 上命議政王大臣等議奏  
尋議厄魯特降人俱係噶爾丹屬下噶爾丹逆天違旨 皇上討  
而滅之俘其屬眾招之使來者有之陸續來降者亦有之並非策  
妄阿喇布坦之人其奏請仍加眷恤之處無庸議噶爾丹多爾濟

被殺亦無庸議至策妄阿喇布坦雖獻噶爾丹骸骨而鍾齊海乃噶爾丹之女吳爾占扎卜等助噶爾丹作惡此輩不便容留策妄阿喇布坦處應令將鍾齊海吳爾占扎卜色稜阿巴車陵布木諾顏格隆等人仍遵前旨擒拏差人起解從之○戊申諭兵部嗣後巡捕營官員降級調用者仍著以巡捕營員缺用著爲令○癸丑上幸喀喇沁和碩端靜公主第○甲寅賜端靜公主和碩額駙噶爾臧金幣○己未吏部議覆湖廣總督李輝祖奏湖南田種不均奉旨均丈改正偏沅巡撫楊鳳起因此案係彼藩司任內承丈造冊出過印結專怙己私罔恤民隱欲取齊各屬並無不均印結混結此案殊屬溺職應將楊鳳起照例革職從之○甲子諭領侍衛內大臣索額圖等 皇太后父母所葬之地在發庫山相去二百里應於道路附近處擇潔淨之地 皇太后遙爲祭奠○己巳

賜和碩端敏公主和碩達爾漢親王額駙班第金幣○辛未以金

璽爲偏沅巡撫

由左副都御史遷

○湖廣總督李輝祖奏湖南界連黔粵

苗徭雜處本年七月十五日賊首黃明率黨吳旦先等百餘人突

至靖州城外傷把總李成功等靖五協副將楊雄追擊賊眾旋潰

又茶陵州與酃縣萬陽山連界本年七月二十四日有萬陽山賊

首陳丹書率眾擁入州城署州事永州府同知史在鑛等被傷劫

印得旨賊徒倡亂傷官劫印該管文武各官著嚴加察議具奏並

敕湖廣貴州廣西等三省督撫提鎮速行勦滅務淨根株毋致滋

蔓仍嚴束弁兵不得借端擾害地方○是月免江南壽州鳳陽等

十二州縣及福建同安縣水災額賦有差

九月壬申朔 上駐蹕克爾蘇臨科爾沁和碩達爾漢巴圖爾親

王滿朱習禮墓奠酒○甲戌 上幸和碩純禧公主第○丙子

上臨科爾沁端貞長公主墓奠酒○丁丑 上駐蹕能諾黑席北  
地方賜純禧公主和碩額駙般迪金幣○己卯 上駐蹕烏楚滾  
賜來朝翁牛特敖漢柰曼阿祿科爾沁郭爾羅斯喀爾喀科爾沁  
喀喇沁土默特諸王貝勒貝子公台吉等金幣○癸未先是 上  
遣內閣侍讀學士伊道等齎敕往諭策妄阿喇布坦至是策妄阿  
喇布坦以諾顏格隆厄爾巴噶卜楚付伊道等遣使滾楚克等覆  
奏 上命議政大臣議奏尋議厄魯特來降之人原皆噶爾丹屬  
下之人並非策妄阿喇布坦之人所奏加眷恤之處仍無庸議策  
妄阿喇布坦懇切請留吳爾占扎卜阿巴色稜等人應停解吳爾  
占扎卜等留給策妄阿喇布坦至鍾齊海乃噶爾丹之女務令解  
來又策妄阿喇布坦奏第巴凡事越理而行前經具奏今仍不改  
查第巴欽遵 上諭擬於來年三月遣發班禪來京策妄阿喇布

坦所奏無庸議從之諭策妄阿喇布坦敕曰朕撫養億兆凡恭順竭誠者必厚待加恩前以吳爾占扎卜阿巴色稜等輩皆助噶爾丹之人恐留於爾地又復作亂亦未可定故命爾解來今爾奏言吳爾占扎卜阿巴色稜等非臣所應分之人但臣人力甚少而哈薩克等人又皆與臣爲難臣得伊等可以助力據實陳情朕矜爾諄懇之意許停解吳爾占扎卜阿巴色稜矣至鍾齊海乃噶爾丹親女不得與他人爲比此斷不許留於爾地務必差人解來如此則許爾照常通使行商爾若仍不肯解來爾不得復通使矣至厄魯特來降朕者原皆噶爾丹屬下人噶爾丹違朕之旨毒害生靈朕親率兵剿滅其屬眾有俘獲而來者有陸續歸降者並非爾之人所奏不准行又爾奏言第巴自臣前次奏後聞其凡事背理而行中國亦常洞鑒之矣朕已嚴敕第巴使遣班禪第巴欽遵朕旨

奏覆於來年三月遣班禪來爾之所奏朕已知之特諭○以梅鎬

爲左副都御史

由宗人府府丞遷

○設直隸永定河南岸北岸分司各一

○己丑工部議覆浙江巡撫張勛奏本年七月十三十四兩日颶

風大作海潮越隄而入衝決海甯縣塘千六百餘丈海鹽縣塘三

百餘丈應令該撫作速修築從之○乙未湖廣總督李輝祖奏茶

陵州叛賊陳丹書等於本年八月初六日被官兵擊敗奔安仁縣

至衡州府城外放火攻門被衡州協官兵追殺至常甯縣城擒獲

陳丹書等下部知之○丙申以張霖爲福建布政使

由安徽按察使遷

○

庚子停盛京烏喇本年決囚

冬十月癸卯

上行圍射殪二虎其一虎臥於山下驚鳥槍聲而

起

上隔澗發矢穿其脇虎應弦倒斃新滿洲等俱大駭奏曰從

未聞隔澗望影能射倒猛虎者也是日駐蹕奇爾賽畢喇○甲辰

皇太后聖壽節 上詣 皇太后行宮前行禮敕封 皇太后

駐蹕之山爲壽山○先是 上蕩平噶爾丹諸王大臣等請立碑

太學至是 御製碑文曰惟 天盡所覆海內外日月所出入之

區悉以畀予一人自踐阼迄今早夜殫思休養生息冀臻熙皞以

克副維皇大德好生之意庶幾疆域無事得以偃兵息民迺魯

特噶爾丹阻險北陲因此一方人旣荼毒塞外輒狡焉肆其兇逆

犯我邊鄙虐我臣服人用弗甯夫蕩寇所以息民攘外所以安內

邊寇不除則吾民不安此神人所共憤天討所必加豈憚一人之

勞弗貽天下之逸於是斷自朕心躬臨朔漠欲使悔而革心故每

許以不殺彼怙終不悛我師三出絕塞朕皆親御以行深入不毛

屢涉寒暑勞苦艱難與偏裨士卒共之迨彼狂授首脅從歸誠荒

裔之長來享闕下西北萬里濯燧銷烽中外乂謐惟朕不得已用

兵以安民既告厥成事乃蠲釋眚災潔事禋望爲億兆祈昇平之福而廷臣請紀功太學垂示來茲朕勞心於邦本嘗欲以文德化成天下顧茲武畧廷臣僉謂所以建威消萌宜昭斯績於有永也朕不獲辭考之禮王制有曰天子將出征受成於學出征執有罪反釋奠於學以訊馘告而泮宮之詩亦曰矯矯虎臣在泮獻馘又禮王師大獻則奏凱樂大司樂長其事則是古者文事武事爲一折衝之用具在樽俎之間故受成獻馘一歸於學此文武之盛制也朕嚮意於三代故斯舉也出則告於神祇歸而遣祀闕里茲允廷臣之請猶禮先師以告克之遺意而於六經之指爲相符合也爰取思樂泮水之義爲詩以銘之以見取亂侮亡之師在朕有不得已而用之之實或者不戾於古帝王伐罪安民之意云爾銘曰巍巍先聖萬世之師敬信愛人治平所基煌煌聖言文武道一禮



樂征伐自天子出朕臨域中逾茲三紀嘗見羹牆寤寐永矢下念  
民瘼上承帝謂四海無外盡隸候尉維彼兇醜瀆亂典常旣梗聲  
教遂窺我疆譬之於農患在螟螣秉畀不施將害稼穡度彼游魂  
險遠是怙震以德威可往而取朕志先定龜筮其依屬車萬乘建  
以龍旂祝融駉鸞風伯戒途宜暘而暘利我樵蘇大野水涸川瀆  
效靈泉忽自涌其甘如醴設爲犄角一出其西一出其東中自將  
之絕域無人獸羣受掩五日窮追彼狂走險大殲於路波血其孥  
剪其黨孽俘彼卒徒眾烏晝號單馬宵遁恐久駐師重爲民困愼  
固戍守還轅於京自夏徂冬雨雪其零載馳載驅我行再至蠢茲  
窮寇昏惑不悔我邊我氓以休以助爰甯其居爰復其賦藩落老  
穉斯恬斯嬉歲晏來歸春與之期春風飄飏揚我旌旆我今于邁  
如涉我郊言秣我馬狼居胥山登高以眺閔彼彈丸天降兇罰孤

雖就羈三駕三捷封狼輿尸既腊梟獍旣獮豺羆大漠西北解甲  
棄爰振旅凱入澤沛郊卜明禋肆赦用迓景福昔我往矣在泮飲  
酒陳師鞠旅誓屈羣醜今我來思在泮獻功有赫頌聲文軌來同  
采芹采藻頌興東魯車攻馬同亦鐫石鼓師在安民出非得已古  
人有作昭示此旨緬維虞廷誕敷文德聖如先師戰愼必克惟兵  
宜戢惟德乃綏億萬斯年視此銘詞○命勒察罕七羅碑文曰康  
熙三十五年歲次丙子四月丙戌朔十三日戊戌 大清皇帝征  
討厄魯特噶爾丹將六軍過此 御筆勒銘惟 天所覆皆吾赤  
子綏靖邊陲殄滅蛇豕山澤效靈草蕃泉旨羽衛斯經貞石用紀  
○命勒拖諾山碑文曰康熙三十五年歲次丙子五月丙辰朔十  
二日丁卯 大清皇帝征討厄魯特噶爾丹駐蹕拖諾山 御筆  
勒銘瀚海蕩蕩臚胸泱泱親御六師我武維揚震雷霆威誓日月

光緒厥兇醜安定遐荒○命勒昭莫多碑文曰康熙三十五年歲次丙子五月丙辰朔十三日戊辰 大清皇帝征討厄魯特噶爾

丹大兵邀擊於昭莫多之地盡殲賊眾 御筆勒銘 天心洪佑

翦逆摧兇困獸西竄膏我軍鋒一鼓而殲漠庭遂空磨崖刻石丕振武功○命勒狼居胥山碑文曰康熙三十六年歲次丁丑四月

庚戌朔 大清皇帝討滅厄魯特噶爾丹駐蹕狼居胥山 御筆

勒銘登狼居胥遡大河曲遐播德威以綏荒服殄寇甯人義正仁育絕域來同敷天永福○以鄂海爲陝西布政使赫嘏爲陝西按

察使

由郎中遷

○丁未

上行圍槍殪二大熊是日駐蹕輝發○已酉

吏部等衙門議准雲南巡撫石文晟等奏雲南北勝州偏近蒙番與永甯府接壤查永甯府並無城郭市廛止設掌印同知一未立衙署該地土司無人管攝請裁永甯府以北勝州改永北府裁知

州吏目另設知府一經歷一永甯府掌印同知改永北府同知北勝州原設學正一今改永北府學教授又順州向係州治久經裁缺屬鶴慶府但去鶴慶府遠而與北勝州近亦歸併新改永北府轄從之○癸丑 上閱興京城駐蹕 永陵西○甲寅 上謁

永陵○遣官奠武功郡王禮敦巴圖魯恪恭貝勒塔察墓○賜守

陵官兵銀幣○江南江西總督范承勳丁母憂命回旗守制○

以孟世泰爲貴州布政使

由河南按察使遷

○兵部議准雲南貴州總督

王繼文奏貴州水西宣慰使安勝祖病故承襲無人請將宣慰使

停襲其水西土司所屬地方改歸大定平遠黔西三州流官轄從

之○丙辰諭內大臣等開國佐運動臣揚古利費英東額亦都三

人效力甚可嘉尙此三人墓朕祭 昭陵日親臨奠酒其餘諸臣

效力亦屬可嘉康熙二十一年曾經祭奠者照前舉行賴親王薩

哈廉克勤郡王岳託等墓各遣大臣致祭尋揚古利費英東額亦都之子孫公福善等奏曰 皇上欲親臨臣等之祖墓奠酒臣等不勝惶懼伏祈 皇上停止 上諭 太祖 太宗開國定鼎爾

祖輔佐勳勞卽爾等亦不能詳悉朕時閱 實錄知爾等之祖於開勅時功績懋著深屬可嘉朕旣親來謁 陵必當臨爾祖墓奠酒爾等毋庸再奏○丁巳 上謁 福陵 昭陵 車駕至盛京

○戊午賑海州鹽城等九州縣饑○己未 上臨奠武勳王揚古利直義公費英東宏毅公額亦都墓○庚申 上詣 太祖 太

宗所御宮殿○以董昭祚爲安徽按察使

由浙江金衢嚴道遷

○禮部奏朝

鮮國王李焯遣陪臣恭進許市米穀及賞給米穀禮物應照例查收得旨朝鮮國爲許市米穀所進禮物著發還餘依議○辛酉賜守 陵及奉天官兵銀幣○壬戌 上奉 皇太后回鑾○丁卯

諭戶部盛京係 列祖勅興之地朕謁祭 陵寢咨詢民生承德等州縣今歲田禾未獲全登宜加恩恤應徵米豆概行蠲免爾部卽移文該府尹徧示閭閻家喻戶曉務俾均霑實惠以副朕愛民至意○是月免直隸豐潤縣旱災額賦十之三

十一月癸酉吏部議覆直隸巡撫于成龍奏永定河流湍迅多致淤淺必需多員因時制宜以收成效應照黃運兩河例於候選候補人員內擇諳練河務者赴工效力從之○戊寅 上謁 暫安

奉殿 孝陵○以吳國柱爲河南按察使由江西贛南道遷○辛巳 上

復謁 暫安奉殿 孝陵至 仁孝皇后 孝昭皇后 孝懿皇

后陵奠酒○癸未 上奉 皇太后還京師○甲申諭大學士等

朕初親政時滿洲無有關毆持刀殺人之事以後漸有犯者及今此風日甚可見習俗浸薄必使還醇歸厚斯爲善耳先時滿洲往

往輕斃其家人朕乃立爲差等之罰今此風則少息矣○乙酉諭大學士等開濬下河民生攸繫朕爲閭閻疾苦深切軫念會命開音布孫在豐于成龍王新命等專司開濬伊等俱奏工程告竣民生大蒙利益載在冊籍存部可考人亦具在可以質詢也由今觀之止是虛糜國帑水勢並未消滅田畝並未涸出所謂有益民生者果何在耶今桑額又奏當行開濬而九卿並不詳詰從前開濬諸人亦不稽考冊籍遽議准行如果此次開濬巨浸全消疆理盡復民業得濟朕於錢糧絕無吝惜卽動發帑金令其興工而已至捐助事例並不宜允行卽今山陝所捐銀米其事尙未明晰也若下河果如其所請疏鑿開濬而桑額等能保水卽消田卽出有裨於民以身家保奏則卽令開濬之御史吳甫生亦以此事條奏所言甚是可將其奏並發九卿詢前此督濬者復稽考諸冊籍然後

確議以聞○丙戌諭大學士等朕君臨天下無分內外視同一體夙夜勤勞政事凡有益於民者務求必濟至於絕域荒陬之蒙古等無不撫育使各安其業咸遂其生近者巡幸所經敖漢柰曼阿祿科爾沁扎魯特等處見其水草甚佳爲孳生蕃息之地而蒙古等漸至窘迫者由其牲畜被盜不敢夜牧故耳朕察知其情曾著原任郎中李學聖往翁牛特員外郎喇都渾往策妄扎卜主事奢冷往敦多布多爾吉等處以教育之此處盜賊屏息漸得生理以此觀之其他處蒙古亦應照此例差才能之人教養一二年則蒙古得遂其生矣如其不然雖賞賜頻仍而蒙古不善營生有何裨益況蒙古王等各私其所屬諸凡問罪盡不得其當必遣內地官員教導一切事務始得就理爾等將朕此諭曉示八旗宗室覺羅滿洲蒙古漢軍內或見任官或革職之人或平人有願往教養蒙



古者著伊等往彼教育消弭賊盜若遇彼處盜案卽與該旗王等會同審理使伊等住一二年卽便撤回誠能副朕諭旨效力勤謹

朕當加不次之恩○辛卯以李基和爲山東按察使

由山西雁平道遷

○

盛京工部侍郎蘇赫緣事降調○壬辰諭大學士等朕觀部院官

員自論俸補授以來久未察劾以至年齒衰邁才力不及者甚多

可令各部院衙門察其年老才劣並行止乖亂者參奏將所參之

人引見○以張鵬翮爲江南江西總督

由刑部尙書遷

白爾克爲盛京工

部侍郎

由盛京禮部理事官遷

○甲午大學士伊桑阿阿蘭泰奏曰臣等年

老凡請旨事件每有遺忘伏祈 皇上別簡大學士共理政務

上曰大學士最爲重任必平坦雍和辦事敬慎者方爲稱職至於

記事學士可分任之爾二人著照舊供職○轉楊舒爲禮部左侍

郎調戴都里爲禮部右侍郎以辛寶爲刑部右侍郎

由內閣學士遷

○乙

未諭大學士等福建巡撫宮夢仁安徽巡撫陳汝器居官俱劣著解任○諭戶部淮安揚州鳳陽比年水患頻仍百姓艱於粒食朕時加軫恤屢賑屢蠲但念久歉之餘恐致資生匱乏開春東作農事艱難若不大沛恩施安能令小民各得其所著將海州山陽等二十州縣衛明年地丁銀米漕糧盡行蠲免○丙申調李振裕爲刑部尙書以熊一瀟爲工部尙書

由工部右侍郎遷

○丁酉諭大學士等

今時際隆冬正當水涸而董安國乃奏水長朕觀其所奏諸事皆於河道水性罔協其宜殊不稱職著革任于成龍原任河道總督今河上工程皆其未完之事其下效力之人亦眾此缺著將于成龍補授速召來京陛見詳議河務令其馳驛赴任董安國未完各項錢糧及修築工程皆逐一交明于成龍又諭修治下河必將上流會赴下流宣洩徧加詳悉勘明始可酌定如果應行修治來年

仲春舉行亦未遲誤照修永定河多派京師官員分委興工庶可

速竣○庚子以張志棟爲福建巡撫由江蘇布政使遷李鈞爲安徽巡撫

原任山東巡撫○是月免江南高郵等五州縣水災額賦有差

十二月辛丑朔河道總督于成龍陛辭上諭聞淮揚河水泛漲

清江浦百姓所居之地皆已被水夫洪澤湖實黃河之障淮水強盛力可敵黃則黃水不得灌入運河今淮水勢弱不能制黃全注運河黃水又復灌入且兩河相距甚近清江浦地處其中其一帶地方受泛溢之害勢所必然惟淮水三分入運七分歸黃運道始安顧大學士等諭曰朕昔年巡視河工會至大墩隄步行十五里詳加閱看今寰宇昇平海內甯謐惟河工關繫運道民生朕數十年來夙夜縈懷留心研究故河道情形熟悉已久總之上流旣理則下流自治矣桑額所奏開濬下河一事朕不卽允行正是有益

於彼桑額固居心平和爲人誠實然遇事不免遲鈍易被人欺如此紛繁事務何以責其成功于成龍屢委以事尙克勉效河工事情緊急與于成龍敕書內須入各部不得掣肘之語使得相機料理庶不誤事河務浩繁于成龍年已漸老且一身難以兼顧奉天府府尹徐廷璽曾任河工尙諳練著卽令前往協理河務又諭河務緊要董安國修築工程繁多恐致與于成龍等彼此推諉可遣部院堂官並率賢能司官前往會同漕運總督桑額將已完未完之工並所用錢糧數目逐一詳明察丈細造清冊齎來尋命戶部尙書馬齊督捕侍郎喻成龍工部侍郎常綬前往○以李光地爲直隸巡撫由工部左侍郎遷○壬寅以李枏爲工部右侍郎原任○甲辰雲南貴州總督王繼文來京陛見上諭大學士等督撫乃封疆大臣陛見之時應將有司賢否小民疾苦詳明陳奏以裨治理夫民

之苦樂皆係於官之賢否官賢則民安否則民之困苦無所底止矣是以考察官吏以獎勵廉潔爲要今雲南貴州總督王繼文入覲並不陳奏及此如廣西提督李林盛居官甚優前者陛見所奏絕無隱諱問及廣西武弁賢否皆從公敷陳其言朕皆書而誌之矣○丙午裁滿洲少詹事諭德各一中允贊善正字錄事各二○丁未諭大學士等運河一帶惟黃水清水交匯之處甚屬緊要此處得宜則他處易治前日于成龍亦謂大墩地方緊要此處修築堅固始可無慮此言極是夫河務深微不訪土著之人不可而全聽其言亦不可如向日天妃閘以板阻水啟板行船須五六百人捧挽方得過閘今已平緩船隻不需捧挽坦然而行以此觀之乃時候之不同也○轉李杻爲工部左侍郎以顧藻爲工部右侍郎

由內閣學士遷

○以劉殿衡爲江蘇布政使

由陝西道遷

○戊申增保定府

理事通判一○庚戌諭宗人府近日朕傳集諸王及閒散宗室於景山校射者將以勸懲賢否也及試以射善射者頗多朕心甚悅其有品秩之宗室俱爲王府護衛官職有遷轉之階惟閒散宗室雖有幹濟之才亦無路上進兆姓中凡有材者尙選擇錄用而朕宗室中之有材幹者不獲登用良可惜也爾衙門將宗室中材力壯健長於騎射者詳查奏聞朕將授爲闕廷侍衛職官視其效力若材力果優勤於供職卽授以副都統參領職任安於庸劣者方罷斥之家貧無力者一併查奏朕將籌其生計○諭大學士等緣事婦人拘喚至部院衙門對簿鞫問於理未協朕因此故曾屢次頒發諭旨今見因事牽連之婦人仍有拘至公庭質訊者嗣後除親身犯罪外無論官民人之妻有事屬牽連應行質訊之處可遣司官筆帖式往其家問取口詞其拘至公庭永行停止○辛亥理

藩院奏蒙古賓客供給應行裁減 上諭大學士等滿丕意見庸劣所議殊屬不合凡扎薩克皆有額設都統副都統等官其諸王則有長史護衛典儀及各項雜職非謂按其品秩賜以食物爲妄費也伊等供給豈可概議裁汰所宜覈查者實授職官之外又妄開寨桑頭目及部下數百人指名冒取供給議裁蓋謂此耳觀其所議必理藩院官員通同蒙古捏造虛名瓜分肥己是以不顧朕之研究此等情事朕洞知之伊等不改前非竟議裁減俟蒙古叩闡之時仍復欲准行耳至喀爾喀前者未附我朝故私設有寨桑頭目之名今俱來降已設扎薩克授以護衛職官又安得有寨桑之稱乎若按其見授秩銜賜之食物彼亦知中國官爵之尊顯效力而服官矣滿不爲人朕素知之其材力雖有可取品行則甚不端也爾等其召而責之○添設光祿寺大官署等四署滿署承各

一○吏部等衙門議准四川巡撫于養志等奏東川土府應改爲東川軍民府設知府一經歷一屬永甯道設遊擊一守備一千總二把總四屬永甯協其駐防兵丁一千於雲南貴州四川三省就近東川地方兵內抽調從之○癸丑以胡會恩爲內閣學士由大理寺遷○甲寅雲南貴州總督王繼文以老病乞休允之○丙辰御

史朱廷鑑奏服滿候補人員內有特簡者有卓異者應不論班次卽行錄用上諭大學士等覽朱廷鑑所奏未必無故但所言之事有當於理夫治國家者以人才爲要朕親簡之官如丁憂服滿起補與降級及一概丁憂者校年補授何時得錄用乎凡條奏合宜卽爲准行其間有私與否朕不問也○丁巳原任內閣學士黃茂等前往教養蒙古請訓上曰蒙古之性懶惰田土播種後卽各處遊牧穀雖熟不事刈穫時至霜隕穗落亦不收斂反謂歲歉



又因盜賊眾多將馬畜皆置之近側夜則圈之宿處以致馬畜瘦斃生計窘乏且蒙古王貝勒貝子公等俱各承襲父爵年在童穉率皆不能教養所屬安輯民人兼之族類性貪見所屬有馬牛刀帶諸物亦必索取遂致困苦難存四散餬口不能禁止亦不能收集是以人皆窮乏爾等至彼查明實無生計者賑給之至於勸善懲惡尤爲要務應會同蒙古王扎薩克等嚴禁盜賊拏獲係兩旗下者爾等卽會同取供情實立刻正法示懲又必加意鞫訊勿得枉殺無辜蒙古地方多旱少雨宜教之引河水灌田朕巡幸所至見張家口保安古北口及甯夏等地方皆鑿溝洫引水入田水旱無虞朕於甯夏等地方取能引水者數人遣至爾所朕適北巡見敖漢柰曼等處田地甚佳百穀可種如種穀多穫則興安等處不能耕之人就近貿易販糴均有裨益不須入邊買內地糧米而米

價不至騰貴也且蒙古地方既已耕種不可牧馬非數十年草不復茂爾等酌量耕種其草佳者應多留之蒙古牲口惟賴牧地而已且敖漢柰曼等處地方多魚伊等捕魚爲食兼以貨賣儘足度日此故宜知之凡有利益朕不時指示爾等當盡心勉勵以副朕意其王貝勒等爾等宜與和協凡事相商而行有訓誨之處須服其心馴致協睦蒙古性情怠玩愚戇者固多然亦樸直但董理教導得宜此輩亦易從也○戊午諭大學士等興起教化鼓舞品行必以孝道爲先節婦應加旌表孝子尤宜褒獎八旗豈無孝子其居官殷實者行孝乃分內事耳貧人克盡孝道誠爲非易如有身處貧寒能盡孝於父母者察明奏聞○己未左副都御史吳涵奏編修檢討等員升轉壅滯請酌復變通編修檢討照李鴻柱楫之例外補一二人少詹事侍讀學士侍講學士等官照王士正徐潮

顧藻王九齡等之例以京堂各衙門調補一二人 上諭大學士等覽吳涵奏翰林官壅滯所奏極是翰林官員係進士內選拔者教習三年又行考試擇其善者始留衙門不但伊等應升缺少以致壅滯卽滿洲漢軍翰林官亦皆壅滯其應升缺出俱與筆帖式較俸升補是以伊等升轉甚遲近見滿洲漢軍翰林所學皆好亦不減漢人此奏朕已知之不必令部議也○以巴錫爲雲南貴州總督貝和諾爲陝西巡撫由戶部右侍郎遷○庚申以魯伯赫爲戶部右侍郎由副都統遷○辛酉 上幸南苑行圍○丙寅 上還宮○是月

免浙江歸安湖廣鍾祥等十一州縣旱災額賦有差○是歲朝鮮策妄阿喇布坦入貢○人丁戶口二千四十一萬六百九十三田地山蕩畦地五百九十八萬六千七百七十五頃三十四畝有奇徵銀二千七百三十九萬八千五百三十八兩有奇米豆麥六百

九十六萬八千四百七十二石有奇草二百八萬一千六百五十  
三束茶十五萬七千四百五十三引行鹽四百三十一萬九千三  
百八十引徵課銀二百六十九萬五百八十二兩有奇鑄錢二萬  
三千八百六萬五千四百有奇

東華錄

康熙六十三

臣王先謙敬編

臣周澹蕃蒸校

康熙三十八年己卯春正月辛卯諭吏部戶部兵部工部朕撫馭  
寰區乂安中外孜孜圖治宵旰勤民期於天下咸遂生成無物不  
得其所今邊烽永靖四方無事獨是黃淮爲患衝決時聞下河地  
方田廬漂沒朕軫念民艱曩曾屢遣大臣督修不惜數百萬帑金  
務期早綏黎庶乃厯年已久迄無成功今水勢仍復橫溢浸漫城  
閭沈沒隴畝以致民多失業董其役者未有上策可以宜民時廩  
朕懷未嘗少釋在內諸臣咸請朕親臨指示爲一勞永逸之圖方  
今春時雨水減少正宜講求疏濬以遂安瀾爰諏吉南巡親加勘  
閱更以吳地襟帶江湖乃東南奧壤屬俗省耕兼行臨視凡一切

往返供億已皆備辦於京師卽途次日用所需亦令各衙門照本地時值採買總於民間一無所累仍恐沿途官吏藉名科派致累閭閻故特頒諭嚴行申飭如有悖旨假託派索者察實卽以軍法從事該地方大小文武官員不許與扈從官員藉稱親舊擅相餽遺違者與受人員並以軍法從事其扈從大小官員隨行儉從人等如有橫行生事者一併從重治罪凡經過地方百姓各安生業皆如常時務令塵無廢市隴不輟耕毋得惶遽引避其軍民人等懷挾私怨受人指使擅於駐蹕處所輒行告訐者一概嚴禁不准仍照衝突儀仗例嚴加治罪爾部卽傳諭扈從大小官員人等並行各該督撫於各府州縣城市鄉村徧張告示備行曉諭務令億兆通知以副朕體恤惠愛至意○壬辰順承郡王寵寶薨以其兄布穆巴襲○丁酉定武選官引見例

二月辛丑朔工部尙書熊一瀟以病乞休允之○壬寅諭大學士等詹事府詹事尹泰不到衙門故其屬官任意懈弛不知禮節著以原品解任仍令纂修書籍○癸卯 上南巡奉 皇太后啟鑾○甲辰予故原任吏部尙書科爾坤祭葬○丁未扈從大臣等會議商南多爾濟等奏請禁止第巴遣人貿易應如所請 上諭前扎海保住等來奏第巴與達賴汗曾會同商議以爲今年乃班禪胡土克圖本命之歲不便前去請俟來歲三月遣之而阿南達等以爲此係推諉之言欲遣二郎保戶木德同彼前去催令速來並駁其奏章朕思阿南達之謀亦失之輕率即使二郎保等前去能令班禪胡土克圖速來耶第巴以匿其奏章禁其貿易藉爲口實彼所屬之人皆賴貿易爲生朕爲天下主何必以班禪胡土克圖之故泥於小見禁其貿易絕其生計乎第巴旣稱來歲使班禪胡

土克圖前來且待至三月如仍不遣來則曲在彼矣我朝惟圖理直凡事豫爲斟酌然後行之亦不爲遲朕已遣扎薩海等作速回京傳諭尙書班迪令其移文阿南達等儻第巴有奏章前來卽行轉奏毋得攔阻商南多爾濟等並不計此卽請禁止第巴貿易之人殊爲未當爾等准其議亦失之矣尋班禪胡土克圖以未出痘疹不敢赴京奏請鑒恤從之○諭領侍衛內大臣等朕念切民依往閱河工凡隨駕官兵執事人員量供使用減少攜帶酌其人數分給官船仍恐沿途或有紛擾爾等再詳議裁減以副朕愛民至意○戊申以總兵官潘育龍訓練有方賜御服貂褂○內閣學士徐嘉炎以老病乞休允之○廣西巡撫王起元奏生擒茶陵州叛案內賊首黃明○壬子諭直隸巡撫李光地等漳河與滹沱故道原各自入海今兩水合流所以其勢氾濫爾等往視如漳河故



道可尋卽可開通引入運河如慮運河難容卽於運道之東別挑一河使之赴海其可否修浚情形爾等閱後再奏○丙辰理藩院奏翁牛特貝勒厄爾德布鄂齊爾公奇塔特等隱匿盜馬賊犯應照例正法左都御史哈雅爾圖察審不實應革職得旨厄爾德布鄂齊爾奇塔特俱從寬免死仍畱貝勒公爵罰俸五年哈雅爾圖降五級調用○戊午以顧祖榮爲內閣學士由詹事遷○設貴州清浪衛學教授一開州廣順永甯獨山麻哈五州學學正各一普安餘慶安化普定平越都勻鎮遠銅仁龍泉永從十縣學訓導各一取進文武生員各八名○辛酉尙書馬齊等勘視河工事竣回奏臣等查勘漕運總督桑額所奏邵伯鎮南金灣小海場鮑家莊等處地方挑濬引河建造草壩俱屬無益應無庸議惟蝦鬚沙溝及興文閘草堰等處開濬淤塞稍可洩水應酌量挑濬下工部議尋工

部議覆應如馬齊等所奏從之○諭領侍衛內大臣等朕閱視河工巡幸南方奉侍 皇太后而來自此前行俱是順流並無畱滯或明日晚後日早朕當分行止乘所御一舟減少扈從晝夜前進往閱黃河以南高家堰歸仁隄等處隄防回至清口候 皇太后船至朕親奉渡河之後相視下河以北隄防則日期與程途庶不相誤矣○予故原任工部侍郎席特納祭葬○戊辰 上閱視黃河以南高家堰歸仁隄等工回至清口奉迎 皇太后舟泊清河縣閘口○諭大學士等原任總河董安國原任河道馮佑將河工敝壞本應治罪姑令於運口並陶家莊王家營等處挑濬引河築挑水壩縷隄戢隄等工贖罪○是月免福建臺灣府屬及陝西南鄭等十二州縣上年水災額賦有差

三月庚午朔

上奉

皇太后渡河泊清河口

上閱視高家堰

歸仁隄等工諭大學士等朕畱心河務體訪已久此來沿途坐於船外審視黃河之水見河身漸高登隄用水平測量見河較高於田行視清口高家堰則洪澤湖水低黃河水高以致河水逆流入湖湖水無從出泛溢於興化鹽城等七州縣此災所由生也治河上策惟以深濬河身爲要諸臣並無言及此者誠能深濬河底則洪澤湖水直達黃河七州縣無泛濫之患民間田產自然涸出不治其源徒治下流終無益也今朕親閱下河通海之口及射陽湖一帶填淤之處于成龍所帶效力人員甚多可作速分委併力開濬蓄積之水儻能稍洩庶幾有益至於黃淮二河交會之口過於徑直所以黃水常逆流而入今宜將黃水南岸近淮之隄更迤東長二三里築令堅固淮水近河之隄亦迤東灣曲拓築使之斜行會流則黃河之水不至倒灌入淮矣再河流不迅急無以刷去河

底之沙朕詳加詰訪河直則溜自急溜急則沙自刷而河自深宜於清口西數曲灣處試行濬直如濬直有益漸將上深曲處漸加直濬庶幾黃河之險自除而河底漸深洪澤湖之水漸出七州縣之水患可漸息矣清口應修之處著于成龍等繪圖呈覽○諭漕運總督桑額河道總督于成龍協理河務徐廷璽等朕念河道國計民生攸關親行巡幸由運河一帶以至徐州迤南細加看閱見黃河底高灣多以致各處受險至歸仁隄高家堰運口等處見各隄岸愈高而水愈大此非水大之故皆因黃河淤墊甚高以致節年漫溢若治河僅築隄防不將黃河刷深終屬無益且運口太直黃河倒灌兼之湖口淤墊以致清水不能暢流各河與洪澤湖之水如何能敵黃水若將清河至惠濟祠埽灣由北岸挑引從惠濟祠後入河而運河再向東斜流入惠濟祠交匯黃水自然不倒灌

朕欲將黃河各險工頂溜灣處開直使水直行刷沙若黃河刷深一尺則各河之水淺一尺深一丈則各河之水淺一丈如此刷去則水由地中而行各壩亦可不用不但運河無泛溢之虞而下河淹沒之患似可永除矣且攔黃壩灣曲馬家港窄狹雖將時家馬頭之口堵築而淮水不能暢流山陽南岸韓家莊等處險工甚屬可虞今應將清口之西壩臺添挑水壩比東壩臺加長包裹清口在內擇洪澤湖水深之處開直成河使湖水流出自黃河灣曲之處直挑引河使各險處不得受衝其攔黃壩應行拆毀時家馬頭決口俟黃水流定汰黃隄築成之日再行堵塞至歸仁隄之建專爲毛城鋪等處水漲衝決於此攔回仍歸黃河之意此隄亦應酌量修築爾等係河臣河務是爾等專責務必將各州縣水災盡除方不負朕南巡救民之至意若挑挖引河原有工程仍照舊令各官

作速修防不可怠忽下河見有積水不可不引出歸海俟引河工竣黃水歸入故道後再將下河串場河射陽湖蝦鬚沙溝一帶挑通引積水流出歸海庶河道永無衝決之患矣○辛未 上御小舟閱視爛泥淺等處○諭戶部朕君臨天下期於黎民樂業各獲其所凡興利除害之事靡不舉行蠲免賑濟之恩靡不下逮比年以來因淮揚所屬地方疊罹水患業已歲蠲額賦賑恤頻施又動支數百萬帑金責令在河諸臣於應挑應築之處酌量修理欲使泛溢之水匯歸入海被淹之田廬涸出庶底幹甯乃糜費錢糧卒不能使積潦有歸田廬未涸民生未遂朕聞之惻然軫懷茲值四海無事之時欲將一切修舉事宜詳閱指示用是躬親臨幸沿途審視黃河水勢咨訪地方父老比至歸仁隄高家堰量度地形高下應挑應築一一明示河臣惟是被淹地方米價騰涌生計維艱

朕目擊民依深用廩念著將漕糧截畱十萬石於高郵寶應興化  
泰州鹽城山陽江都受災七州縣各畱一萬石悉較時價減值發  
糴此各州縣發糴之米著就近交與漕運總督邳州著遣司官一  
員前往監視再截畱米十萬石於揚州淮安各收貯五萬石此應  
畱漕糧不論何處米石著就近截畱○壬申 上閱視黃河隄岸  
駐蹕淮安府○諭河道總督于成龍王公隄甚屬險要須加幫高  
寬修築堅固○乙亥 御舟泊高郵州諭河道總督于成龍朕昨  
駐蹕界首用水平測量河水比湖水高四尺八寸湖水似不能越  
此隄而入運河但當湖石隄被水汕壞工程甚屬緊要著差賢能  
官員作速查驗修築○丙子 上駐蹕揚州府諭河道總督于成  
龍朕在清水潭九里地方用水平測量河水高湖水二尺三寸九  
分此一帶當湖之石隄甚爲緊要可速行修造至高郵州地方見

河水向湖內流河水似高一尺有餘趁黃河水未深之時急宜修理○庚辰諭領侍衛內大臣等此地麥田茂盛朕心深喜此來原爲民生凡駐蹕處勿使踐踏田畝至於隨駕兵丁已足守衛此處之兵盡著發回其將軍副都統及各官員等既係該管地方著乘舟隨行可徧行曉諭凡有踐踏麥禾者察出決不輕貸○諭河道總督于成龍朕自淮南一路詳閱河道測量高郵以上河水比湖水高四尺八寸自高郵至邵伯河水湖水始見平等應將高郵以上當湖隄岸高郵以下河之東隄俱修築堅固有月隄處照舊存畱有應修隄岸仍照舊隄堅築至於邵伯地方因無當湖隄岸河湖合而爲一不必修築隄岸聽其流行高郵東岸之滾水壩涵洞俱不必用將湖水河水俱由芒稻河人字河引出歸江入江之河口如有淺處責令挑深如此修治則湖水河水俱歸大江各河之



水旣不歸下河自可不必挑濬矣○壬午詔山東江南辦夫船官有革職畱任以下公罪俱原之免前三歲逋賦赦死罪以下○癸未 上駐蹕蘇州○甲申諭大學士等朕巡閱河道將高郵州之

湖與河水比量河水高四尺餘夫湖水旣低四尺有餘縱水長一丈亦不至泛越且湖水亦斷不至高長丈許朕意欲暫畱毛城高家堰等處減水壩將高郵州以北減水閘壩盡行堵塞築高東岸隄防使在西之水不得泛越則下河之水歸海而河道湖身皆出其時作何導濬再行定奪至於邵伯以南河湖合流奔江歸海想不至衝決其他處河道朕亦可保無虞獨黃河工程尙難決定相其形勢當緩圖之○乙酉諭兵部前者京口江甯接駕官兵亦曾扈送朕恐踐損麥田盡行遣還今往浙江塘路甚狹隘可傳諭該管官員不必令官兵扈從○戊子 上幸浙江詔曰朕以黃淮衝

決兼欲周知東南風俗特行巡省比以治河方略指授河臣隨涉江表徧察民依頃至蘇州而浙江文武官民僉赴行在言望幸之心至切朕俯順輿情揚旌前發一切供億皆出內帑儲備無擾於民凡經過地方百姓各安生業務令塵無廢市隴不輟耕副朕體恤惠愛至意○辛卯 上駐蹕杭州○癸巳改山西太原府通判爲理事通判○乙未詔浙江辦夫船官有革職畱任以下公罪俱原之免前三年逋賦赦殊死以下○丙申 上幸演武場閱兵親率諸皇子射 上親射二次發矢皆中又命十五善射硬弓侍衛等射次命官兵分班校馬步射既畢 上復率諸皇子及善射侍衛騎射 上初騎射中的的躍又騎射縱轡近的馬忽左逸 上既調執弓矢左射中的的躍眾環跪云 皇上神武洵天縱也 上諭大學士等朕今觀杭州滿洲漢軍官兵皆善騎射嫻熟滿語

此皆將軍查木揚訓練所致今查木揚已故殊爲可惜大學士伊桑阿等奏曰 皇上今日騎射馬忽斜馳臣等以爲不及發矢矣 皇上輒轉弓矢以左手射之且中的眾無不歎異 上曰朕以

馬逸而轉射何足稱奇耶○賜浙江湖州府知府陳一夔父故溫處道陳丹赤 御書名垂青史額諭曰爾父爲國殉難朕至今憫之賜此特表爾父之忠○戊戌 上奉 皇太后回鑾○是月免

江南海州山陽等九州縣及淮安大河二衛去年逋賦

夏四月庚子朔 上駐蹕蘇州○辛丑諭戶部禮部朕子育黎元勤求治理日夜孜孜以施德澤厚民生爲急務而江浙二省尤東南要地朕時切軫念比歲以來蠲豁田賦賑濟凶荒有請必行無災不恤雖漕項錢糧向未蠲免者亦曾特旨蠲免愛養之道備極周詳庶幾民生日益康阜用是乘輿時邁於視河事竣巡歷江浙

咨訪民間情形見淮揚一路旣困潦災而他所過州縣察其耕穫之盈虛市廛之贏絀視十年以前實爲不及此皆由地方有司奉行不善不能使實惠及民所以小民雖懷愛戴之誠而朝廷恩澤卒未下究朕目擊靡懷亟思拯恤截畱漕糧寬免積欠另有諭旨惟各鹽差官差向因軍需繁費於正額外令在差官員以所私得贏餘交納充用今思各官孰肯自捐私橐必仍行苛取商瘠民困職此之由著將加增銀兩一概停罷以紓商民之累其兩淮鹽課康熙十六年曾加增銀四十萬兩今恐商人辦課維艱有漸至匱乏者著減去二十萬兩此外有應行應革事宜朕還都以後仍加商榷次第舉行該督撫藩臬皆地方大吏亦著悉心體訪凡有可爲民興利除害者作速勘實陳奏嚴革雜派禁止刁訟俾胥吏不能作奸良民得以安業儻官吏有悖旨妄行許商民首告該督撫

察出卽行參奏朕視民如傷惟恐一夫不獲其所茲值海宇昇平  
兵革不事正當與民休息之時故特渙沛德音減徵寬稅以爲閭  
閻畱有餘之力至於江南浙江人文稱盛入學名數前已酌定增  
額今著於府學大學中學小學各增五名舉行一次以示獎勵人  
才至意○丙午吏部議覆廣西巡撫王起元身任巡撫應遵定例  
將南甯太平慶遠思恩四府調補道府以下三年俸滿之員保奏  
升用今十餘年來並不保奏一人及僉都御史王紳奏參奉旨明  
白回奏該撫又蒙混掩飾具奏應降四級調用從之○戶部議覆  
浙江巡撫張劬奏浙省開局鼓鑄已經兩載今錢價日平應行停  
止從之○己酉 上駐蹕江甯○裁江南通省管河道一復設山  
清裏河同知安清通判各一添設盱眙通判宿桃通判各一○庚  
戌諭大學士等明代洪武乃勦業之君朕兩次南巡俱舉祀典親

往奠醑今朕臨幸當再親祭大學士等奏曰 皇上兩次南巡業蒙親往奠醑今應遣大臣致奠 上曰洪武乃英武偉烈之主非尋常帝王可比著兵部尚書席爾達致祭行禮朕親往奠○壬子

上至明太祖陵奠爵閱視陵寢諭大學士等朕今日往明太祖陵寢致奠見其圯毀已甚皆由專司無人朕意欲訪察明代後裔授以職銜俾其世守祀事古者夏殷之後周封之於杞宋卽今本朝四十八旗蒙古亦皆元之子孫朕仍沛恩施依然撫育明之後世應酌授一官俾司陵寢俟回都日爾等與九卿會議具奏○

上幸演武場閱兵○甲寅命修明太祖陵懸挂 御書治隆唐宋

額○江甯左翼副都統朔色以年老乞休得旨副都統朔色爲人甚劣著革職○乙卯詔免鳳陽府屬去年逋賦○庚申 上駐蹕揚州○辛酉諭河道總督于成龍等運河東岸石工殘缺者仍令

照舊補修其土工隄內積水之處下埽幫築減水壩俱堵塞堅固  
用心防護越壩更屬緊要亦著加幫防護淮安府涇澗兩河必須  
挑濬深通毋任淤墊至於人字河若有窄狹處亦當相機挑挖凡  
有洩水舊口修砌涵洞令民灌田隄岸單薄處亦酌量加幫河身  
戲隄務行修築朕業已指示止高五尺底寬二丈頂寬七八尺以  
遏水勢足矣至河員不留心防範者須嚴加懲處切不可姑容致  
誤河工○以彭鵬爲廣西巡撫

由貴州按察使遷

○丙寅上渡黃河御

小舟閱新埽諭河道總督于成龍曰黃河灣曲之處俱應挑挖引  
河乘勢取直高郵等處運河越隄灣曲亦著取直上登清口南  
岸召郎中朱成格等諭曰此南岸若不修挑水壩新挑引河必不  
能暢流當從朕所釘椿處修挑水壩二三十丈挑出水頭大溜向  
北俾引河流暢尾隄在陳家莊旱地築高五尺水長時從陳家莊

南任其流去無礙此事關繫緊要爾等卽遵諭行○以佟毓秀爲

貴州按察使

由江西鳳  
慶道遷

○戊辰直隸巡撫李光地等奏臣等遵旨

查看漳河見在分而爲三支自廣平縣經魏縣元城縣至山東  
館陶縣入衡水歸運一支俗名老漳河自山東邱縣東北經南宮  
等縣與完固口合至鮑家嘴而歸運一支俗名小漳河自邱縣西  
北經廣宗鉅鹿三縣合於滏河又經束鹿縣冀州合於滹沱河由  
衡水至獻縣完固口復分爲兩支其小支與老漳河合流至鮑家  
嘴其大支復經河間大城靜海三縣總入子牙河而歸淀查此三  
支兩支入運其一支又復分流入運則入運之水已多子牙河之  
水自減可以無慮但歸衛之河與老漳河皆有散漫淺平之處應  
酌量挑濬其完固口小支河應築雞嘴壩及攔河壩偪水入河至  
於靜海縣田地淹沒因向年開廣福樓及閭畱二莊口之故若竟



堵諸口又有礙西隄請俟水落之後暫行堵塞至來春水涸於閘  
畱二莊出水處挑成河道兩岸築隄束水歸淀則靜海縣地方不  
致淹漫而大城等州縣隄岸均無妨礙矣得旨著照該撫所奏速  
行

五月庚午命張鵬翮扈從入京以陶岱署江南浙江總督

由吏部  
右侍郎

署○辛未

御舟泊仲家閘

御書聖門之哲縣子路廟額○甲

戌諭戶部朕返蹕行經山東沿途延見父老咨詢農事幸今歲雨

暘時若二麥繼登小民可以無憂粒食但前年被災泰安等二十  
七州縣生計尙未豐盈宜更加恩休養所有康熙三十六年未完  
地丁銀米俱著免徵其康熙三十七年應徵錢糧原因災傷令於  
康熙三十八年完納今念一歲之內並輸二歲之租恐物力艱難  
未能兼辦著分作三年帶徵以示寬恤○乙亥諭大學士等黑龍

江將軍薩布素辦事雖明敏然器局卑瑣朕巡幸至烏喇每見其逢迎近侍朕聽政多年何事未厯僉王端良夫豈不辨彼近臣何能爲也今黑龍江副都統關襄等私動驛站一案其事俱實著該將軍查審具奏尋薩布素遵旨審覆副都統關襄疲勞驛站應革職枷責得旨著從寬免降五級調用○癸未改山清盱眙河營守備爲裏河守備添設高家堰河營中河河營守備各一○乙酉

上奉 皇太后還京師○丙戌諭大學士九卿詹事科道等朕南巡至浙江見百姓生計大不如前年來已將舊欠錢糧盡行豁免其被災地方概行賑濟恩澤屢加在百姓應比往年豐足今反不及從前者皆因府州縣官私派侵取餽送上司或有沽名不受而因事借端索取更甚者至微小易結案件牽連多人遲延索詐者甚多此等情弊督撫無有不知乃不釐剔察參反將行賄官員薦

舉廉正官員糾劾以致民生失所殊失朕愛養元元至意且畿輔近地因朕不時巡察故無私派侵取等弊若各省督撫俱體朕愛民至意實力奉行自然吏治澄清萬民樂業科道不畏人不徇情能將不肖劣員察訪糾參則有司亦知忌憚今作何永革橫派嚴禁賄賂以察吏安民爾等會同確議具奏尋大學士等遵旨會議請飭各該督撫洗心滌慮正己率屬凡有貪污害民官員不時查參地方應革積弊盡行革除如該督撫仍照前因循專事虛文塞責徇庇屬員或被科道糾參或被受害人首告將該督撫等一併從重治罪從之○諭大學士伊桑阿等朕茲南巡見地方官員誠心爲民者甚寡一切務虛名而無實效甚無取焉朕觀河工亦非難事任事者果皆竭誠效力加意奉公何難告厥成功耶若刷河底極深徑趨入海諸水仍出清口歸海則高郵等處不告水災而

下河亦可無虞矣又見沿途鈔關已極頽敝皆由關差監督未經簡選但較俸差往其中貧窮卑猥者或將親戚家僕或傭雇人役挈之而往任此輩恣意妄行自有害於商賈且盤結關津亦有害於百姓嗣有關差俱令本衙門堂官保舉始行差遣○丁亥以馬爾漢爲左都御史由兵部侍郎遷○轉王澤宏爲吏部左侍郎調王掾爲吏部左侍郎管右侍郎事由戶部左調○四川巡撫于養志奏參四川提督岳昇龍欺罔各款一受革職天全土司高一柱賄屬令帶罪護理今高一柱借稱謀逆重情專殺土民高于岳等八人以致官民互訐臣行司提審提臣岳昇龍密拘犯證自行審理以圖掩蓋前愆一霸引行鹽驅逐小販以致商販失所一各鎮協營每歲勒索空糧百餘石一借陞見爲名將馬二百餘匹分發各鎮協勒索重價一因兵部職方司失火行令備造卷案借端扣剋兵糧一四川

營內馬匹動支朋銀購買岳昇龍乃借端科派於通省遊守千把  
每員扣銀三十五兩通省馬兵每名扣銀二兩得旨此本內事情  
著工部侍郎羅察內閣學士布泰前往察審具奏于養志又奏打  
箭鑪原係內地土司邊界自康熙三十五年勘明地界以來甚屬  
相安今因化林坪接壤西域設汛添兵乃擦道等處蠻番忽生狡  
變事關邊情理應文武會商而提臣岳昇龍剛愎自用並不使臣  
與聞遽行調遣官兵阻遏商旅禁絕茶米以致軍民惶惑得旨此  
本內事情亦著羅察等一併察審具奏○癸巳大學士伊桑阿以  
老疾乞休 上謂大學士阿蘭泰曰伊桑阿爲人厚重老成辦事  
年久爾二人自任大學士以來不生事端凡事推誠從公料理不  
獨朕知之天下無不知者非尸位素餐者可比伊桑阿雖以老疾  
求罷不忍令去也○以王鴻緒爲工部尙書

原任左都御史○甲午九卿

議覆山西巡撫倭倫遵旨回奏布政使齊世武揭報原任太原府知府孫毓璘原任大同府知府鄭潤中虧空兩案齊世武將臣批駁之處一概隱匿惟存心傾害以捏報等款誣臣臣謹將齊世武欺罔蒙蔽之實迹陳明臣等查齊世武揭文及倭倫回奏疏內各項參差言詞互異又齊世武呈稱證見按察使巴哈布糧驛道李苾知府王輔等見在山西不便懸擬應遣大臣往山西察審定擬具奏得旨此本內事情著戶部尚書馬齊前往察審具奏○乙未轉覺羅三寶爲兵部左侍郎以布雅努爲兵部右侍郎原任陝西巡撫六月戊戌朔諭大學士等當今凡事俱可緩圖惟吏治民生最難刻緩諺云湖廣熟天下足江浙百姓全賴湖廣米粟朕南巡江浙詢問地方米貴之由百姓皆謂數年來湖廣米不至以致價值騰貴然楚省官吏並未奏報水旱又聞湖南百姓甚苦皆由興永朝

王樸楊鳳起三人相繼擾害所致見任總督李輝祖爲人誠實辦

事頗優但俱係于成龍薦舉欲其不徇情面將從前廢弛整理斷

斷不能李輝祖可召進京以侍郎用原任左都御史郭琇前爲吳

江縣知縣居官甚善百姓至今感頌其人亦有膽量無朋比郭琇

著補授湖廣總督令馳驛赴任○轉錢三錫爲戶部左侍郎調田

雯爲戶部左侍郎管右侍郎事轉徐潮爲刑部左侍郎以李輝祖

爲刑部右侍郎由湖廣總督遷○辛丑九卿議覆山西巡撫倭倫奏被參

汾陽縣知縣李聯虧空庫銀一萬九千餘兩並無分釐民欠署縣

事汾州府通判韓開藩代李聯科派里民私徵完銀四千兩有餘

布政使齊世武揭報巡撫倭倫一案見遣大臣往審此案亦應交

與所差大臣一併審明究擬從之○戊申予故吏部左侍郎趙士

麟祭葬○辛酉九卿遵旨議覆刑部尙書傅臘塔等察審原任陝

西巡撫布喀控告四川陝西總督吳赫等侵蝕籽粒一案應將原任總督今升尙書佛倫降四級調用總督吳赫等革職其籽粒銀兩應免追徵百姓令在事官員賠償 上諭大學士等朕詳閱此案甚不明晰以布喀控告而處分吳赫若吳赫控告又將處分布喀乎況此案每奉批駁但擬加重有是理耶籽粒事及吳秉謙叩闕一案並倉米事仍著傅臘塔張鵬翮赴陝西詳審